

齊乘卷之二

益都于欽思容纂

益都水

濰水 水經云出琅邪箕縣濰山許慎呂忱云箕屋山

淮南子云覆舟山廣異名耳實一山也今清風山在莒州

莒縣北百里漢箕侯國地東北流逕仲固山折泉水

入焉折泉出松山漢有折泉縣又東北逕密州城西

折而北涓水合扶淇水入焉涓水出馬耳山扶淇出

常山竝見水經今名李齊河又北盧水入焉盧一名

久台音怡水出盧山漢橫縣之故山也道元謂盧水側有不灰木野火

燒死炭不滅又東北至巴山密水入焉密又名百尺有二

齊乘

卷之二

一

源一出障日山東坡所謂小峨嵋者一出五弩山今作

鹵山又東北涓水入焉涓出高柘山高柘山今名臺頭

東北納荆水三齊記昔人堰涓入荆溉稻田萬頃荆水出荆山逕平昌

故城臺下合霤泉入涓道元謂濰水過平昌臺下有井與荆水通有龍出入其中

土人謂其城曰城陽城臺曰城陽臺電泉者又北逕

龍且冢冢在濰水東岸五里淮陰囊沙處也道元謂高密碑產

山西古人堰濰水以溉田散流入夷安潭亦此地今高

密西有古堤南起岑冢北互蔡冢長三十餘里謂是

岑彭與蔡伯喈冢非也正古堰遺跡土人名曰趙貞

女防夷安潭今名又北逕城陰故城西又北至安邱

東北古淳于城側汶水入焉又東北過昌邑又東北

入于海漢志濰或作淮故俗亦名淮河

淄水 書傳曰出泰山郡萊蕪縣原山之陰東至博昌

入海按地志水黑為淄元和志云俗傳禹理水功畢土石黑數里之中波流皆黑

故謂之淄水也 出今益都縣顏神鎮東南二十五里岳陽山

東麓地名泉河古萊蕪地岳陽即原山也東北流逕

萊蕪谷又北逕馬陵俗名長峪道按此即晉郤克追齊至馬陵賈逵曰

一作馬陵俗以為龐涓之馬陵非是 出峪東流聖水入焉聖水出家桑

谷又曰神泉列仙傳鹿皮公所飲者見水經又東北

逕牛山折而北天齊淵水入焉又北漸平聲 臨淄東城

又東北逕安平故城北又東北逕樂安縣東古廣饒

地又北入巨淀今清泊水 又北出注馬車瀆今高家港 合時水

入海淄多伏流俗謂上下有十八漏按通志略曰杜

齊乘

卷之二

二

預謂淄入汶班固謂淄入濟桑欽謂淄入海考其形

勢當以杜為正豈其然乎諸說惟桑氏為有據不特

此耳宜其以水名家也

時水 通志略曰一名形襄三年齊晉盟于形是也其

源岐淺多涸竭又名乾時莊九年公與齊侯戰于乾

時是也道元曰時水出齊城西南廿五里平地出泉

即如水也水色黑又名黑水今按時水之原南近淄

水詳其地形水脈蓋伏淄所發土人名曰烏河西北

逕黃山又北逕愚山又屈而逕杜山澧水入焉澧出

臨淄西南十八里所謂澧中孟子去齊三宿出畫故

又名宿留水俗謂之泥河又北逕臨淄城北系水入

焉系出臨淄城西申門卽申池水也門側小阜曰包山俗又名包河竝城北流分爲二俱入時一支逕梧臺前西入者曰系水一支遠至博興東南李監橋入者曰澗水詳見澗水條時水又北至般陽新城縣東南索鎮口下可通舟楫又北至博興南地名灣頭灤水會焉灤卽小清河又東逕利縣故城在樂安西又東逕樂安縣北又東北由馬車瀆入海水經謂時水自西安城南石羊堰分爲二支津西北合黃山之德會水黃阜之南五里泉至梁鄒入濟旱則涸竭此乾時也今不通矣欽嘗自濟南護先妣喪由小清汎舟東下至博興沂時水南上至索鎮而登陸去益都僅九十里耳

齊乘

卷之二

三

益都衆水惟此通舟未嘗淺涸焉

澗水 水經註澗水出臨淄縣北世謂之漢溱水逕博興縣南貝邱齊侯田見公子彭生處又西北入時水昔晉侯與齊侯宴曰有酒如澗指喻此水也卽今臨淄西門申池水北流者勢極屈曲俗稱九里十八灣過梧臺北小泥河入焉泥河出梧臺下又北至博興李監橋入時水此正澗水也魯仲連謂田單黃金橫帶騁乎淄澗之間此水與淄東西竝流臨淄介其間故齊侯有酒之喻田單馳騁之地淮南子謂淄澗合流易牙嘗而別之者皆指此水也古諺謂瘦馬不渡澗南燕李宣謂澗水不冰良由逼帶京城者乃濁水

耳詳見濁水條

巨洋水 水經云出朱虛縣東泰山國語謂之具水袁宏謂之巨昧王韶以為巨蔑或曰胸瀾或曰沫實一水也今謂之洱河出沂山西麓即東泰山也東北流至臨朐縣東南熏冶泉入焉熏冶出縣南西溪又北沙河出東阜下北來入焉又北至臨朐城東逕覆釜山又北逕委粟山水經云孤阜秀出形如委粟今名粟山又東北石溝水入焉石溝出逢山東北石澗中山麓三成水經名北洋蓋因巨洋在南也又東北龍岡水出臨朐東北窰山東來入焉又北過益都府城東北建德水合南陽水入焉建德水出府南七里澗俗名七里河水東

齊乘

卷之二

四

猶有建德村

道元云建德出逢山邳泉出平地今按平地之邳泉在建德水源之東北入建

德非入巨洋也

南陽水見後條又東北康浪水入焉道元云

康浪出劇縣西南嶼山西流入巨洋即今香山南狗

王河

三齊略曰康浪水在齊城西南十五里康衢側

微細且歌云中鯉魚長尺半此水豈足當之寰宇記又謂康浪水在淄州皆不可信當從水經云又

北逕巨昧店耿弇追張步處又東北逕辟閭渾墓俗名釣魚臺又東北逕故益縣城古別出一支為百尺

溝

道元謂西北入巨淀者此溝也今廢

又北逕壽光縣東北水經云舊

有孔子問經石室即蒼頡墓也堯水入焉堯一名蕤

又名青出府東南七十里角崩山又東北由黑冢泊

入海

黑冢泊述征記謂之烏常泛齊人名湖為泛冢即秦皇望海臺也

余按漢志石

膏山洋水所出東北至廣饒入巨淀卽此水也但因北洋而誤其源因支津別出而誤云入巨淀曾肇南洋橋記乃以洋爲南陽非也洋爲齊之大川故以巨名道元所謂羣書盛言孟堅不應捨大而志小

南陽水 水經註長沙水出逢山北阜世謂之陽水北

注濁水通名爲陽而有南陽北陽之論

又云逢山卽石膏山麓三

成壁立直上

余按南陽水出府城西南二十五里石膏山

卽逢山之西麓也東北逕廣縣故城西又東北石井水注之水出劈頭山北流注井積石高深瀑布而下故曰石井亦謂之石子澗卽今之瀑水澗也時有通塞南陽水又北而東貫益都南北兩城間西逕表海

齊乘

卷之二

五

亭東逕故城陽王廟基古人自廟東塌斷使北注濁水今復東流十五里合建德水入巨洋

北陽水 漢志曰爲山濁水所出東北至廣饒入巨淀水經謂之北陽亦謂之澗水出府城西南三十里九

回山

俗名九扈

古廣縣爲山也東北逕五龍口又北逕廣

固廢城行於絕澗之底水激而岸峻古諺謂瘦馬不渡李宣謂逼帶京城皆指此也又北逕堯山東至東陽城北又東北逕石槽城又東北逕臧臺又北至樂安東北獾河口合女水

女水後條

又東北入巨淀 曾肇

南洋橋記曰俗呼洋水有二曰南洋河今橋所在是

也曰北洋河距城北二里者是也北洋傳記無文今

出九回山入淄水此水不入淄在齊記謂之澠水道元則

曰羣書盛言洋水出臨朐陽水導源廣縣兩縣雖鄰

川土不同於事疑焉然則洋分南北當後魏時已不

能知況後世哉今辨之曰羣書盛言出臨朐者此巨

洋也漢志失其源委耳南陽自爲長沙水北陽自爲

濁水導源廣縣者是也曾氏乃因漢志石膏山之洋

水而以陽爲洋誤矣蓋石膏山與逢山連麓長沙水

即南陽水出其西石溝水即北陽水出其東洋水自出臨朐沂

山漢志讀如詳與蜀之洋州同音故水經稱洋水則

有巨洋北洋稱陽水則有南陽北陽稱南洋者無之

俗所誤矣四水雖以音同致疑源流可攷惜乎曾氏

齊乘

卷之二

六

之不察也

天齊淵 漢志曰齊所以爲齊以天齊也秦祠八神一

曰天主祠天齊天齊淵居臨淄南郊山下五泉竝出

南郊山即牛山也按此淵在臨淄東南八里淄水之

東女水之西平地出泉廣可半畝土人名曰龍池西

南流入淄水牛山在淄水南遙以爲志耳蘇林註曰

當天中央齊也顏監曰謂其衆神異如天之腹齊齊

記補引晏子曰吾聞江深五里海深十里此淵與天

齊淵中浮出瓦有天齊字魏永平中水潰出不五北

齊天保中又出木四皆五采類松柏而香構亭水上

臨淄俗上已被楔于此有神祠曰休應之廟余按六

書故齊本作亦作象禾穀之秀齊也引之爲整齊齊一又爲國名借爲人之腹齊莊子達生篇曰與齊俱入與汨俱出齊者水之旋紋今人謂之旋窠狀類腹齊豈淵泉竝出旋流如齊以其祠天稱曰天齊邪抑天然淵水猶曰齊之天淵云耳且臨淄非天地之中何謂天之腹齊深與天齊尤覺誕妄

女水 水經云出東安平縣蛇頭山又名鼎足山今臨淄東南十五里俗呼二王冢者因山兩墳謂是桓公與其女之冢水出冢側因以名焉然此水通塞不常出則逕石槽城東北入北陽水水經云女水至安平城南伏流十五里然後更注陽水今石槽城古安平東

齊乘

卷之二

七

北平地出泉俗名馬臺河至樂安東北獾河口合北陽水入巨淀土人云此卽二王冢水伏流者未知是否齊記補引黃石公記云東海龍女隱于此石室尙存將還作此水甚有神焉化隆則水生政薄則津竭述征記亦有此說恐未必然通鑑作汝水南燕汝水竭卽此水也

汶水 水經出朱虛縣小泰山今沂山絕頂穆妃陵側有瀑布泉懸百丈崖而下卽汶水也東流循鳳凰嶺折而北逕大岷山陰岷水入焉穆陵關之水又北逕蔣峪口有水出峪中西來入焉水經有岷山疑卽此水又北逕龜山陰山形如龜臨水乃折而東逕柴阜水經注阜南管寧冢北邳原冢

又東北逕安邱南牟山水經注山又東北逕安邱城

西又東北入于濰水經注古淳于縣顏監曰前言汶

水出萊蕪入濟今此又言出朱虛入濰將桑欽所說

有異或者有二汶乎余按入濟之汶見禹貢論語之

汶上書傳謂之北汶即今大清河入濰之汶見漢書

入沂之汶見水經齊有三汶清河為大述征記泰山郡水皆名汶

有北汶嬴汶柴汶牟汶皆源別流同又在三汶之外

丹水 竹書云堯放丹朱于丹水朱虛縣有丹山一名

凡山黃帝所禪又名堯山下帶長阪曰破車峴東西

二丹水出焉記謂丹朱弄兵之所今按西丹出丹山

在臨朐縣東北三十里東丹出方山在丹山東北寰宇

齊乘

卷之二

記丹山角崩方山遠望正方二水皆北流至昌樂廢城西北乃相

合通名為丹河北入于海寰宇記丹水入昌樂縣界引以溉田今按齊地衆水

可引溉者極多古人陂渠遺迹猶有存者自金人入中原民俗偷惰為政者何慮及此然則史令所譏豈

特西門豹也哉

白狼水 水經註出丹山逕北海郡城東入別畫湖亦

曰朕懷湖東北入海余按白狼有二源一出丹山隋志

作白狼山一出北海縣南小王莊平地泉湧如輪上源合

此始大逕濰州東門外古有石梁金泰和間僧普濟

所修遺迹尚存又東北過寒亭合漑水入湖由湖入

海漑水出塔山寰宇記云山形如塔又名漑源山即今東虞河以州

西有西虞河故此云東西虞出黃山又有朱流河出

方山七里河出蒙姑山三水皆在州西北流入海

巨淀馬車瀆 漢志曰為山濁水所出東北至廣饒入

鉅定又曰馬車瀆首受鉅定東北至琅槐入海定作

淀水澤名縣因氏焉即今樂安東北清水泊也北出

為馬車瀆今高家港也淄水濁水入巨淀時水入馬

車瀆同歸于海南洋橋記乃以鉅定為巨洱河今巨

洱自壽光東北入黑冢泊巨淀馬車在壽光西北相

去六十餘里不合漢書首受鉅定之文濁水亦無入

巨洱之理曾子開誤矣 溝洫志東海引鉅定溉田鉅

膠水南定渚渠即漢武所耕處非東海地

膠水 水經云出黔陬膠山今膠州膠西縣西南鐵櫬

齊乘

卷之二

九

山也北逕密州東北鹵山古名五弩山鹵水入焉 寰宇

記膠水出密州諸城縣東崦山或亦曰膠水出鹵山皆非是

又北逕高密縣東北

入都灤都灤者水經謂之夷安潭秦地圖謂之劇清

池即古豨養澤也張奴水出高密東阜下亦注此澤

自澤北出注新河 張奴水一名墨水側有張奴店 由河北入于海

其東北入海者膠水之故道差淺而新河為經流新

河者至元初萊人姚演建言首起膠西縣東陳村海

口自東南趨西北鑿陸地數百里欲通漕直固海口

數年而罷余嘗乘傳過之詢土人云此河為海沙所

壅又水潦積淤終不能通徒殘人耳演真鄭國之罪

人也

姑尤水 左傳昭二十年姑尤以西注齊東界姑水尤水皆在城陽郡東南入海今按沽水有二曰大沽河出黃縣南蹲狗山俗名狗兒山曰小沽河出萊州南馬鞍山二水俱南流逕膠水縣東南朱毛城東朱毛即古即墨城乃相合通名爲沽河至膠州東南入海沽水起北海至南海行三百餘里絕齊東界故曰姑尤以西尤即小沽河耳

沂水 鄭康成云沂水出沂山水經云出蓋縣艾山寰宇記艾山一名臨樂山在新泰縣東北三十里道元則曰沂有二源一出祚

泉山一出魚窮山余按今蒙陰縣東北地名南河川

小阜之下有曰狗泉泉傍神祠塑黑狗不知何據疑此則臨樂山也此沂源

齊乘

卷之二

十

也東南逕馬頭固山有泉東流與之合北望沂山五十里殊無別源據周禮沂山因沂水得名康成又齊之大儒不應有誤疑沂山水源古流今竭耳沂水過馬頭固南流逕蓋縣故城又南至沂水縣城西又南至河陽村桑泉水西來入焉道元云桑泉出五女山南流納堂阜水即今蒙陰東北憚阜大小二河也又南合蒙陰水通名爲汶河東注沂水經桑泉亦稱汶故今云沂水又南逕諸葛城又南逕王祥墓孝感水入焉其水出墓西戚溝湖剖冰躍鯉之地又南至沂州城東小沂水西來入焉小沂出蒙山西東過費縣神山納祊水祊出縣南關陽川至沂州西又分爲涑水涑自州城

西小沂自城北俱入沂宋慶歷間沂州修城碑云大
小二沂環流外轉而小沂尤湍于西北平日波如簞
紋清淺可愛及山雨水至如百萬陣馬摩壘而來謂
此水也沂水又南分流入三十六穴湖東通沫水詳
見沫水條又南逕古郟城又南至下邳入泗下邳古
城在今邳州南道元云沂水至下邳分爲二一自城
北趨西南入泗一自城之東南入泗東沂水上有橋
郡國志謂徐泗閒呼爲圮橋音怡也子房遇黃石公進履
處今入泗者西沂耳

沫水

水經註大弁山與小泰山連麓沫水出焉

大弁今訛

屏作大

漢志謂之術水元和志云俗名漣水出沂山東

齊乘

卷之二

十一

麓逕大峴山峴水入焉

穆陵關南入沫之水

又南至老牛嶺

嶺長

二十里

折而東逕嶼山嶼水入焉嶼水出嶼山水經謂

之箕水又南至洛山洛水西來入焉洛水出壇頭山

又南逕莒州城東又南沙河水西來入焉沙河首受

西湖水湖受黃華諸水皆莒城西北羣山泉瀦爲湖

又南溫泉西來入焉

泉出沂州東北湯山古名溫水阪鼎足三穴沸如湯道元謂西

入沂非也

又東逕倉山

道元云山上有鹽官城卽漢封劉釘之利城武陽溝水出此東入沫

今屬贛榆縣

馬嶺羽山

殲縣東南百十里是也

由吾

寰宇記巨

平山南有由吾廟隋文帝徵道士由吾拜諫議大夫卒葬此山水經又云沫水逕司吾山東疑卽巨平山

也漢有司吾縣

羣山聯絡沫東沂西夾山而行山峽之間有

山口池者俗云禹鑿沂水由三十六穴湖貫此峽口

與沫相通

道元謂辟陽水首受曷陂水入沫者蓋此水也今沂州東北有葛溝也

又南

至沫陽縣入桑堰湖

烏侯切道元謂桑堰水出襄賁東入沫湖因此名元和志云碩

澗湖在沫陽縣東八十里與胸山澗水三分湖為界今訛作桑口湖

由湖東出入于海

沫水至此正名澗水故縣氏焉道元又謂沫水下流

古分為二

今名南澗北澗

魏正元中齊王鎮徐州立大堰遏

水西流兩瀆之會置城防之名曰曲沫戊其流西入

淮陽由下邳入泗余按宋金相拒宋人亦堰此水乃

防北敵遺迹在今海寧沫陽界中

泲水

音加俗作泲去聲讀

泲水有二東泲出沂州西北其山

城內

普照寺有金僧居山頌碑作其山

南流至卞莊站

國初立站今廢

東分一支

入芙蓉湖溉田數千頃湖在沂州東南芙蓉山下香

齊乘

卷之二

十二

粳鍾畝古稱琅邪之稻卽此西泲出嶧州東北抱犢

山東南流至三合村與東泲合

又有魚溝水出浮邱山合于此故名三合

南貫四湖溉田倍芙蓉又南合武河入于泗謂之泲

口淮泗舟楫通焉元和志云承縣界有陂十三所皆

貞觀以來修立以溉田者今沂嶧二州仰泲承二水

溉田青徐水利莫與為匹皆十三陂之遺迹也武河

者疑卽漢志冠石山之武水水經亦謂之小沂上流

有故渠俗名文河土人云浚此渠六十里使武河通

沛可避呂梁徐洪之險而徑達新濟矣徐邳人恐徒

河無業每沮之

承水

音澄漢縣名

元和志云承縣以西北承水得名寰宇

記云承治水出縣西北方山王莽改承縣爲承治故水有此名今又訛爲承治本出嶧州北六十里花盤山之車梢峪源曰滄浪淵淵旁有龍祠宋政和閒賜額霖澤廟其水南流合許池泉今滄浪淵水微細不及獨許池爲正源矣承水又南逕州城西門又南納金注河又東會武河南入于泗承水溉田千餘頃旁多美竹人賴其利

南梁水

後漢志魯郡蕃縣

蕃音皮

有南梁水道元曰蕃

縣東北平澤泉若輪焉南鄰于鄒亦謂之西鄒水首受蕃縣西注山陽湖陸二水皆由沛入泗今按南梁水出滕縣荆溝村西南流至滕州東門外折而過城

齊乘

卷之二

十三

北又西入山陽湖山陽俗曰刁陽由湖南出注于泗南有辭水卽古鄒水出州東高山春秋魯取邾田自鄒水杜註水出東海合鄉縣西南經魯國至高平湖陸縣入泗蓋此水也又有沙河水出鄒嶧山皆西南流至山陽湖與南梁相合同入于泗名三河口

般陽水

籠水 水經註作瀧水南出長城中寰宇記云古名孝水齊有孝婦顏文姜事姑孝養遠道取水不以寒暑易心感得靈泉生于室內文姜常以緝籠蓋之姑怪其須水卽得值姜不在入室發籠觀之水卽噴涌壞其居宅故俗呼爲籠水今孝婦河也出益都縣顏神

鎮孝婦祠下

古齊長城踰泰山東互于此

西逕萊蕪山陰北注般

陽城西般水入焉般亦名左阜水出淄川縣東南龍

山龍灣洞俗名頭河西北流至般陽城東分爲二一

支逕城南一支環城西北俱入籠故水經云般陽縣

在般水之陽也籠水又北逕長山縣西又北逕鄒平

縣東蒙河水入焉蒙水俗名沙河出長白山葫蘆峪

水經謂之魚子溝又北逕新城縣西又北入小清河

濟南水

灤水

源曰趵突流曰灤東導曰小清

曾南豐齊二堂記曰泰山北與

齊東南諸谷之水西北匯于黑水之灣又西北匯于

柏崖之灣而至于渴馬之崖則泊然而止

今黃山下

自崖

齊乘

卷之二

十四

以北至于歷城之西蓋五十里有泉湧出高或致數

尺名曰趵突之泉齊人謂嘗有棄糠于黑水灣者見

之于此其注而北則謂之灤水春秋桓公十八年會

齊侯于灤是也今府城西平地泉源鬻湧雪濤數尺

聲如隱雷旁合馬跑金線諸泉周可數畝北出又合

蜜脂五龍衆泉竝城北流屈而東至城北水門大明

湖水出而注之東北至華不注山合華泉

卽齊頃公下如華泉

取飲者三齊記云歷山下有無底井與此泉通山之西南引水溉田水經謂

之歷水陂餘波西注大清曰聽水卽今之響河古灤

水自華不注山東北入大清河僞齊劉豫乃導之東

行爲小清河自歷城東逕章邱鄒平又東逕般陽之

長山新城又東逕高苑至博興合時水東北至馬車
 瀆入海曲行幾五百里故自濟南東傅博興南源衆
 水古入濟者今竝入小清焉 小清爲運鹽河初行
 高苑縣北金皇統間縣令高通改由縣南長沙溝然
 此水迂曲上流岐淺鹽舟多梗議者欲引孝婦水西
 注上流非計也蓋小清舟不過欲達大清耳若自博
 興引渠至蒲臺立堰平原僅五十里徑達大清矣
 大明湖 水經註灤水北爲大明湖西有大明寺水成
 淨池池上有亭湖水引瀆東入西郭而側城北注又
 上承東城歷下泉源競發北流出郭注灤水詳此則
 大明湖亦源于灤城西五龍潭側古有北渚亭豈池

齊乘

卷之二

亭遺跡邪湖今在府城內周十餘里卽歷下泉源競
 發北流出郭者也歷下名泉有曰金線東 鈞 突 曰皇華
 曰柳絮曰臥牛東 金線 曰東高曰漱玉南 金線 曰無憂曰
 石灣鈞 突 南 曰酒泉曰湛露西 無憂 曰滿井曰北煑糠鈞 突 南
北 曰北珍珠白雲樓前 曰散水曰溪亭北 珍珠 東 曰濯纓北 珍珠 西
 曰灰泉濯纓樓前 西 北 曰知魚灰泉 東 南 曰朱砂灰泉 最 大 自 北 珍珠
以下皆匯于此周回廣數畝當是大明湖之源也 曰劉氏北 珍珠 西 北 曰雲樓劉氏 南
南 曰登州曰望水萬竹園內 曰洗鉢登州 北 曰淺井曰馬跑
洗鉢 南 曰舜泉舜祠下 曰香泉舜泉 西 曰鑑泉舜泉 南 曰杜康
廟 舜 曰金虎曰黑虎李承務巷 曰東蜜脂金虎 西 南 曰西蜜脂
東 蜜 脂 曰孝感孝感坊內 曰玉環同知巷前 曰羅姑場 東 曰

混沙曰灰池城西南角場下曰南珍珠鐵佛巷東曰芙蓉姜家亭前曰

滴水又名清泉西務北曰灰灣曰懸清龍城西五堂東曰雙桃丁城字

北街曰溫泉北城西石橋下曰汝泉神童寺內曰龍門一名龍泉神童寺東

曰染池龍門東曰懸泉中宮東曰都泉中宮東南曰柳泉曰車

泉中宮東莊遠曰煑糟四里南曰爐泉南山下曰白虎曰甘露

大佛曰林汲佛峪內曰白泉王舍店北曰金沙曰白龍龍山中

曰花泉張馬泊曰獨孤靈巖寺曰醴泉巖北曰漿水盤水鎮東

南曰南煑糠螭山北曰苦苣柳鋪東曰熨斗黎峪門莊曰鹿

泉石固寨曰龍居長城西嶺合約突百脈總七十二見名泉

碑然遠至中宮靈巖諸泉具載而華不注之華泉明

水鎮之淨明泉皆失不取況其名亦未甚雅稱蓋殘

齊乘

卷之二

十六

金俗筆欽嘗擬會波樓記略云濟南山水甲齊魯泉

甲天下蓋他郡有泉一二數此獨以百計濤噴珠躍

金霏碧滄韻琴筑而味肪醴不殫品狀在邑者瀦市

之半在郭者環城之三棊布星流走城北陬匯于水

門東流為灤竝于汶過于時入于海可槩見矣

百脈水 水經出土鼓縣故城西元和志出亭山縣東

北亭山在府城東南九十里 源方百步百泉俱發故曰百脈即繡

江源也郡國志云十二斤溝俗名麻灣出章邱縣南

明水驛明水一名淨明泉出百脈西北石橋邊其泉

至潔纖塵不畱土人以洗目退昏翳與西麻灣水合

流三里餘入繡江乃東北流逕東陵山漸章邱東城

又北入小清河縣東七里有楊緒水一名獺河水經云出逢陵故城西南逕章邱城北入濟水今按獺河出長白山之王村峪逕章邱東北入小清河 曾南豐齊二堂記云泰山之北與齊東南諸谷之水西北匯于黑水之灣又西北匯于柏崖之灣而至于渴馬之厓泊然而止至歷城西湧出趵突之泉嘗有棄糠于黑水灣者見之于此其注而北謂之灤水齊多甘泉顯名者十數而色味皆同皆灤水之旁出者蔡氏援此以證濟水之伏破程氏之論當矣又取沈存中筆談謂歷下發地皆泉濟水經過其下自相矛盾何邪且古濟行清河如在井底南仰泉源遙在山麓豈能相及今黃山渴馬厓水伏而可證又龍洞山中朗公谷諸水東西伏流土人云西發趵突東發百脈驗之信然蓋歷下衆泉皆岱陰伏流所發西則趵突爲魁東則百脈爲冠地勢使然何關於濟存中得之傳聞九峯按圖索駿容有疑誤近官濟南者遂定以灤爲濟建濟瀆廟于泉上謬矣

巨合水 水經註巨合水南出雞山北逕巨里故城耿弇討費敢處又北合武原水入濟按巨里在歷城東七十里自宋爲龍山鎮巨合水出鎮南五十里曰榆科泉逕巨里西武原水出鎮南十餘里曰江水泉逕巨里東俗訛爲東西巨冶河俱北流五里餘乃相合

北入小清河巨合之得名以此道元云巨里三面有城西有深坑坑西卽耿弇營蓋二水環繞因崖以城爲險固也

六清河

古濟今汶

水經註濟枯渠注巨野澤澤北則清水

巨野今梁山泊也北出爲清河古自壽張縣安民亭

亭北對安民山今曰安山

合汶水文出泰安萊蕪縣原山之陽水

經謂之北汶西南逕徠山陰又西逕泰山之陽漢武明堂遺跡臨水謂之石汶又西逕汶上縣北又西逕東平城南其西卽安山閘閘下泥河口有亭子店古安民亭遺趾清濟與汶合處今閘清水南導任城則清濟不入汶汶自行古清河矣汶水又北逕漁山

齊乘

卷之二

十八

東卽瓠子歌之吾山在安山東有漢隄遺跡自西而東屬之麓山西曹子建冢山東漢黃河故渠又北逕陽穀縣西流水合狼水入焉又東北逕東阿縣道元云縣東北有清亭春秋隱四年遇于清以河得名也又東北逕平陰縣廣里保古齊長城防門河道所由春秋齊侯塹防是也廣里見水經又名光里又北逕巫山齊侯登以望晉師者俗訛作無兒山山上有石室水經謂之孝子堂今日郭巨廟清水過此古爲湄湖又東北逕齊河縣縣南門外有梁跨水古朝陽橋遺跡耿弇渡處齊河縣在宋爲耿濟鎮沙溝水出山在縣南來

入焉

今肥城縣東南有沙溝鎮以水得名

又北逕上灤橋北灤水分響

河入焉

古名聽水

又東北逕華不注山陰又東逕下灤堰

灤小舊入濟處堰南卽小清河又北逕臨邑縣又東

北逕

濟陽

縣又北逕齊東縣

河間路屬縣古東鄒

又東北逕蒲臺

縣又東北逕高苑縣北又北逕利津縣城東又東北

入于海

水經云濟至古平安爲淵渚謂之平州沉又東北至琅槐鄉有古黃河通濟枯渠謂之潒

河又東北入海元和志謂海浦浦旁有一沙阜高丈餘俗呼鬪口淀濟水入海與海潮相鬪故名淀上有

井極甘海潮不能没

朱子韓文考異曰按水經河水至東阿在

平等縣東北流四瀆津灌注之河水東分濟水受河

蓋滎口水斷不通始自是出與清水合昔趙殺鳴犢

孔子臨河而歎作歌曰狄之水兮風揚波舟楫顛倒

更相加歸來歸來胡爲期按臨濟故狄也是濟所經

齊乘

卷之二

十九

得其通稱詳此則是濟水自滎澤之下潛流至此四

瀆津口而復出河又東分一支與之合流以過臨濟

而爲狄水然此皆齊地在今濟鄆之間史記以爲孔

子自衛將西見趙簡子則其道不當出此此又不可

曉者今姑闕之以俟深于地理者考焉欽按漢陳畱

郡平邱縣有臨濟亭故狄也蓋濟水出陶邱北南瀆

被孟豬北瀆注巨野亭臨此瀆故曰臨濟春秋時狄

人據此因以名焉此水夫子所歌至王莽時枯竭水

經所謂濟枯渠注巨野者也其自巨野北出至四瀆

津與河合流者乃齊之清河水經所謂得其通稱者

是也漢千乘別有狄縣安帝更名臨濟唐又別以漢

東朝陽爲臨濟今章邱之臨濟鎮也文公蓋疑于此云

古河 朱文公九歌註曰禹治河至兗州分爲九道以殺其溢其間相去二百餘里徒駭最北鬲津最南徒駭是河之本道東出分爲八枝也胡氏大記曰大陸澤北九河之地平延漫流易淤故禹多與之地使下流通曠齊桓擅一時之利適河行徒駭因以八河之地充樹藝立城邑下流始迫溢爲患欽按河過大陸趨海勢大土平遷徙不常自播爲九禹因而疏之非河獨行經流禹于旁近支鑿以殺其溢也禹後歷三代至齊桓時千五百餘年矣支流漸絕經流獨行亦

齊乘

卷之二

二十

理勢如此非齊桓冒曲防之禁故塞九河實九河自爲平陸可樹藝耳至定王五年河遂南徙矰磔漢世漸決而南元帝永光中決于清河分流入博州後又決于平原乃東入青齊二州之境遂由漯川與濟竝行入海宋紹熙以後乃南連大野并泗入淮金初又改由渦近歲復由泗入淮河濁淮泗俱清清淮勢大可以吞伏故下流無淤塞之患惟汴宋之郊盤屈平壤潰決如故自定王以來又千五百餘年河自北而南徙千餘里今按桑田之地講求變遷之陵谷欲盡合古書難矣漢世去古未遠河隄都尉許商言九河故道謂徒駭在成平

金獻州樂壽縣景城鎮古有成平城

胡蘇在東光

今景州東光縣東連滄州古有胡蘇亭 鬲津在鬲縣德州有鬲縣城曰太史曰

馬頰曰覆釜在東光之北成平之南曰簡曰潔曰鉤

盤在東光之南鬲縣之北斯言簡而近實後世圖志

雖詳反見淆亂欽嘗往來燕齊西道河間東履清滄

熟訪九河故道蓋昔北流衡漳注之今之御河漢初猶入河漢魏時

名漳水隋唐以來名御河河既東徙漳自入海安知北流之漳非

古徒駭河歟宋會要神宗熙寧三年議開御河臣寮奏云可于恩州武城縣開約二十餘里

入黃河北流故道下五股河詳此則御河入黃河北流故道無疑也踰漳而南清滄二

州之間有古河隄岸數重地皆沮洳沙鹵太史等河

當在其地滄州之南有大連澗今曰大梁五龍堂宋碑作大連疑卽隋末

羣盜所據之豆子航也西踰東光東至海此非胡蘇河歟澗南

齊乘

卷之二

至西無棣縣百餘里間有曰大河曰沙河皆瀕古隄

縣北地名八會口土人云因河會得名縣城南枕無棣溝茲非

簡潔等河歟無棣溝通海隋末廢塞唐薛元鼎開之百姓歌曰新河得通舟楫利直達滄海

魚鹽至昔日徒行今騁美哉薛公德滂被凡此溝澗今皆為鹽司堰塞平時潴水不通纔遇霖雨水即

潰溢故河間清滄之地常被水害無有寧歲吾友伯答爾都水嘗言撥丁河數鰲課與山東運司帶辦

廢堰泄水則河間永無患矣東無棣縣北有陷河

數里西通德棣東至海茲非所謂鉤盤河歟德州有盤河鎮

濱州北有士傷河西踰德棣東至海茲非鬲津河歟

士傷河最南比他河差狹是為鬲津無疑也所謂士傷者土

人云昔日戰場因傷賢人故云按水經漢安帝時劇縣賊畢豪等乘船寇平原縣令劉雄門下小吏所輔

浮舟追至厭次津戰敗為賊所擒輔求蔡氏書傳乃

代雄豪縱雄殺輔于此津蓋此河也

曰自漢以來講求九河皆無依據祖王橫之言引碣石爲證謂九河已淪于海欽按禹貢文北過泲水至于大陸又北播爲九河同爲逆河入于海大陸在邢趙深三州之地爾雅之廣河澤也去海岸已數百里

犬陸又曰鉅鹿呂氏春秋曰鉅鹿之北遂分爲九河路史云九河始元城大名縣西三里有故瀆鄭夾漈謂大陸非趙地之廣河澤乃汲郡之吳澤也如此則又遠之矣

又東至海中始紘九

河則大陸與九河相離千里如是之遠而絕無表志不合禹貢之文其不可信一也王橫謂海溢出浸數百里而青兗營平郡邑不聞有漂沒之處而獨浸九河其不可信二也今平原迤北清滄之間雖爲樹藝城邑相望而地形河勢高隱曲折往往可尋但禹初爲九厥後或三或五遷變多寡不同必欲按名而索故致後儒紛紛之論不得不辨

海 海岱惟青州謂東北跨海西南距岱跨小海也本

名渤海亦謂之渤海海別枝名也蓋太行恆嶽北徼

之山循塞東入朝鮮今高麗海限塞山有此一曲北自

平州碣石南至登州沙門島是謂渤海之口闊五百里西入直沽幾千里焉漢王橫乃謂九河之地淪爲小海然則唐虞之時青州跨海者跨何海邪且海溢出浸數百里河自秦漢以來青兗營平郡縣不聞有漂沒之者足證橫失海溢者有之橫言之過也近世蔡氏書傳金履祥通鑑前編皆祖橫說又謂小海所

淪青兗北境悉非全壤豈二州北境有荒漠棄地爲海所漸而歷代信史不之書邪無是理也蓋因委九河於海中指碣石在海外遂有此論今青境無缺茲不必辨古兗之地自今濟南以西北包濱棣滄瀛帶雄鄭西襟深冀南遶曹濮東括魯鄆四至亦不狹矣在春秋戰國其地瓜分後世從而小之未詳考也金氏又云碣石有二在高麗者曰左碣石在平州者正禹貢之右碣石也乃今沙門島對岸之鐵山正當渤海之口果爲右碣石則唐虞之時青兗東北直岸大海無渤海矣此又可信邪今齊境東南則日照卽墨膠州正東則寧海登州皆岸大海東北則萊濰昌邑

齊乘

卷之二

二十三

正北則博興壽光西北則濱棣二州皆岸渤海云

齊乘卷二

錢唐周嘉猷兩膝校

齊乘卷二考證

濰水

折泉水入焉 漢書地理志王子侯表竝作折泉水經注及太平寰宇記作析泉第四卷折泉城放此

漢志濰或作淮故俗亦名淮河 顧氏曰濰水士人名

為淮河齊乘諸城志云云竝誤 諸城志謂水從櫟根出故以音同呼為淮

河 愚按古人省文濰字或作維或作淮總一字也漢

書或作淮者从水从鳥佳之佳即濰字而省其中糸

耳今呼為淮則竟為江淮之淮从水从佳人之佳差

之毫釐失之千里矣 地理志琅邪郡朱虛下箕下

作維靈門下橫下折泉下作淮序文引禹貢惟留其

齊乘考證

卷之二

一

道又作惟一卷之中異文三見其旁竝从鳥佳之佳

則一爾

時水

道元曰時水出齊城西南二十五里 近刻水經注作

西南北二十五里 衍北字 戴東原訂本作西北誤

石羊堰 今水經注本作石洋

巨洋水

王韶以為巨蔑 當作王韶之

石溝水水經名北洋 按水經注以石溝為漢志之洋

水無北洋之名道元謂巨洋又東北洋水注之自以

東北二字相屬為文非云北洋也于氏蓋緣此致誤

耳

堯水一名蕤又名青 按水經注堯水卽蕤水北逕嶼山東俗亦名之爲青水矣青水館本據永樂大典作青山則是嶼山之異名非堯水之別號矣

南陽水

石井水出劈頭山北流注井積石高深瀑布而下故曰石井卽今之瀑水澗也 按石井水有二源其東源出李堡峪在劈頭山之陽峪南山俗名李僊山或云醴泉之譌也李僊山西阜之西爲黃峪西源所發也兩峪皆有石井窟穴深透村人略加椎鑿以通繙瓶而西源特盛當夏秋霖潦之時水溢出井西北流逕故廣縣城東爲瀑水澗古名石井水者目其源也自水經注誤以積石瀑布爲井于氏因之非穴地出水之義矣

天齊淵

抑天然淵水猶曰齊之天淵云耳 按此條及沿革下竝引漢志曰齊所以爲齊以天齊也若云齊之天淵則是以國名水非以水名國矣此可見著書不自牴牾之難也

女水

出蛇頭山又名鼎足山 元和郡縣志作鼎定山或傳寫之誤

通鑑作汝水 按女水無汝名通鑑文誤辨見胡身之注

汶水

折而東逕柴阜水經注阜南管寧冢阜北邴原冢 據水經注當云柴阜西南有管寧冢東有邴原冢 入濟之汶見禹貢書傳謂之北汶卽今大清河 此未盡然辨見大清河條下

入沂之汶見水經 汶非徑入沂此誤讀水經注也見沂水條下

丹水

寰宇記丹山角崩方山遠望正方 按寰宇記引晏謨

齊乘考證

卷之二

三

齊記云劇城東南有方山遠望正方無丹山角崩之文

膠水

直固海口 卽直沽已見釋音

沂水

道元曰沂有二源一出柞泉山一出魚窮山 按水經注云沂水有二源南源所導世謂之柞泉北水所發俗謂之魚窮泉俱東南流合成一川則柞與魚窮皆泉名非山也柞書作柞亦誤

桑泉水出五女山南流納堂阜水又南合蒙陰水通名爲汶河東注沂 按水經注桑泉水又東南與雙嶺

水合水有二源雙會東導一川俗謂之汶水也東逕蒙陰縣注桑泉水是酈注云俗名汶水者乃雙箇水入于桑泉桑泉自入沂水今于氏以桑泉水爲汶故前汶水條下云入沂之汶見水經誤矣

沫水

逕嶼山嶼水入焉 嶼當依水經注作箕

溫泉出沂州東北湯山古名溫水阪 溫水阪水經注作溫泉陂

武陽溝水東入沫 據水經注當云西入沫

羽山元和志在臨沂縣東南百十里 按元和郡縣志

羽山在胸山縣西北一百里太平寰宇記兩載于胸

齊乘考證

卷之二

四

山臨沂縣下一云在胸山縣西北九十里一云在臨

沂縣東南一百一十里于氏誤引作元和志耳

道元謂桑堰水出襄賁東入沫 今水經注本作桑堰水

魏正元中齊王鎮徐州 正元當作正光此沿水經注誤本而譌

洳水

武河疑卽漢志冠石山之武水 漢書地理志泰山郡

南武陽下云冠石山治水所出南至下邳入泗應劭地理風俗記乃云武水所出水經注謂之異名也

南梁水

後漢志魯郡蕃縣有南梁水 郡當作國又按漢書地理志魯國蕃縣下云南梁水西至湖陵入沛渠濟渠之譌不應舍前書引後志也 范書無志劉昭取司馬彪續漢書志補之此條後漢志亦當作續漢書志
二水皆由沛入泗 沛當作濟字本作涑故漢書地理志及水經注竝譌作沛以字形相似而誤

灤水

三齊記云歷山下有無底井與此泉通 太平寰宇記引作續述征記非三齊記也

華不注山之西南引水溉田水經謂之歷水陂餘波西注大清曰聽水即今之響河 胡書巢歷城縣志曰

齊乘考證

卷之二

五

按水經注云陂水上承東城歷祀下泉

陂本作湖井脫一泉字今

依館本據永樂大典改正

泉源競發其水北流逕歷城東蓋是時

歷城縣故城甚小在今縣治西南偏不過今城三分之一所云左水西逕歷城北西北為陂此則宋以後所稱為大明湖者下方云謂之歷水與灤水會則二水皆在當日之城外明矣又云又北聽水出焉聽水自注巨合水入濟水經注甚明齊乘以灤之下流名曰響河者當之非也

大明湖

水經注云云 按水經注云灤水北為大明湖湖水引瀆東入西郭東至歷城西而側城北注此言灤水匯

爲大明湖又東北流也又云陂水上承東城歷祀下
泉泉源競發其水北流逕歷城東又北引水爲流杯
池分爲二水右水北出左水西逕歷城北西北爲陂
謂之歷水與灤水會此言歷水受東城衆泉會于灤
水也又云又北歷水枝津此六字今本誤首受歷水于歷城
東東北逕東城西而北出郭又北注灤水此言歷水
枝津入灤水卽上文所云右水北出者也敘次致爲
明析而于氏此條所引于側城北注下徑接云又上
承東城歷下泉源競發北流出郭注灤水是殆混大
明湖與歷水陂而一之矣蓋思容知大明湖爲灤水
所匯而不知今湖所在實古歷水陂與水經注之明

齊乘考證

卷之二

六

湖無涉故其說遷就附會不了了耳

陂水上承東城歷祀下泉

今本譌作湖水故于氏誤以爲承上文湖水引瀆東入西郭而言也

湖今在府城內 歷城縣志曰水經注云灤水北爲大
明湖則大明湖自在城西南蓋灤源左右前後發地
皆泉其瀦爲湖卽去灤源泉不遠今此地半爲衢肆
蓋後人築土水中爲之耳求其地而不得乃以今城
內之湖當之其誤蓋自金元以前矣

百脈水

楊緒水 今水經注作楊渚溝水按太平寰宇記及金
史竝作楊緒或古今本有不同第四卷甯戚城條下
放此

大清河

古濟今汶 閻百詩曰自漢至隋唐惟有濟水杜佑始有清河之名宋南渡後始有大小清河之分齊乘以大清爲古濟水而以小清爲劉豫所導後人皆沿其說其實非也

禹貢錐指云清河東流既微故劉豫堰灤水使東以益之

以水經注

元和志寰宇記諸書考之濟水最南漯水在中河水最北今者小清所經自歷城以東如章邱鄒平長山新城高苑博興樂安諸縣皆古濟水所行而大清河經自歷城以上至東阿固皆濟水故道而自歷城東北如濟陽齊東青城諸縣則皆古漯水所行蒲臺以北則古河水所經

此東漢以後之河至利津縣古千乘海口入海者也

蓋唐宋

齊乘考證

卷之二

七

時河行漯川其後大清兼行河漯二川其小清所行則斷爲濟水故道也 按汶水舊于東平州西南安民山入濟則由東阿而北東至博興入海者皆濟水矣濟水故瀆自壽張以上不可復尋水經注所謂枯渠注鉅澤北則清口者今其地已爲會通河所橫絕而汶水不復入濟會通河者元世祖至元二十年自濟寧開河至安民山導汶水入泲與泗沂會二十六年又自安民山開河至臨清分汶水屬之漳御以達天津通謂之會通河是時汶水旣南北分流以資運道而濟水故瀆之東北出者所受汶水乃其餘波蓋大清河雖首受運渠實合東阿山中西流白鴈諸泉

及濟南諸泉峪之水以成巨川未可竟以汶水目之
自杜佑通典謂清河爲荷澤汶水合流非本濟水于
氏因之直云北汶卽大清河矣夫汶水自泰安至東
平堰入運河自有經流而東阿膠井歷下灤源等泉
昔人咸以爲濟水之伏則清河雖非滎澤陶邱之舊
亦他水之所不得而亂也明永樂九年築戴村壩于
東平盡遏汶水出南旺湖南流合泗沂者十之四北
流合漳衛者十之六其由減水閘以被于大清者涓
流殆絕而歲旱運河乏水之時大清亦不聞涸竭豈
可專汶之名哉

水經謂之北汶 按水經注汶水又南右合北汶水水

齊乘考證

卷之二

八

出分水豁所謂北汶者汶之別源非通名出萊蕪入
濟者爲北汶也蔡氏書集傳始有北汶之目于氏誤
舉耳

汶水又北逕漁山東 當作魚山从水誤

又北逕臨邑縣 按大清河至歷城東北卽入濟陽縣
界不逕臨邑蓋臨邑漢漯陰縣地大清所行爲漯水
故道則臨邑本其所經自金初置濟陽縣分臨邑疆
域之半而邑境無清河矣

水經云濟至古平安爲淵渚謂之平州沉 今本無沉
字戴本作坑乳勇切

朱子韓文考異云云 此條所引多誤以朱子原文校

之凡數事一原文引水經河水東北流四瀆津下接注云二字謂酈善長注文也今改作灌注之三字而刪其釋四瀆之名者一原文孔子歌曰歸來歸來胡爲斯今誤作胡爲期一原文是濟所逕得其通稱也下接又云濟水逕臨濟縣南九字今刪去一原文然此皆濟也今誤作皆齊地按孔子時大河過東昌堂邑縣西不逕在平水經注以四瀆津爲孔子臨河不濟之地固非而其引臨濟故名狄縣則以見狄爲濟水所逕之通稱與所云濟水又東北過臨濟縣南者無涉而韓文考異乃云過臨濟而爲狄水此朱子之誤然云今在濟鄆之間是朱子蓋誤以臨濟在四瀆

津側非指千乘之狄縣而言其所疑者特以衛都濮陽爲今開州地四瀆津今屬長清遠在衛東孔子自衛適晉不應出此耳今于氏改濟也爲齊地則濟鄆竝不屬齊漢唐之臨濟縣一屬樂安國一屬濟南郡在宋爲淄齊二州地非濟鄆之間也云文公蓋疑于此失其指歸矣 又按自衛都適晉當由戚邑西渡河戚衛河上邑左傳襄公廿九年吳公子札自衛如晉將宿于戚是也故城在今開州水經注河故瀆東北逕戚城西非濟水所逕也于氏以爲漢陳畱郡之平邱在今陳畱縣北九十里漢縣廢水經濟濟水又東過平邱縣南注云故衛地也平邱之西北爲延津鄭廩自延地延津渡河而北卽晉朝歌矣孔子嘗過匡又過蒲皆

在今長垣縣又嘗至儀在今蘭陽縣則夫子或由衛西南境北至延津未可知也但于氏謂平邱有臨濟亭故狄也按平邱未嘗名狄續漢志注封邱有狄溝卽敗狄于長邱是也左傳文公十一年杜云宋地今封邱縣東有長邱亭與平邱接壤若取狄溝之名則不必云濟水所逕之通稱矣封邱亦濟水所逕水經又東過封邱縣北是也于氏泥酈注臨濟故狄之文因展轉致誤如此

古河

至定王五年河遂南徙砮礮 按此沿蔡傳之誤以砮礮爲地名不知何據漢書溝洫志賈讓奏言滎陽漕渠足以卜之如淳曰今礮谿口是也水經濟水又東

齊乘考證

卷之二

十

至礮谿南酈注云世謂之礮石澗初無砮礮之目蓋漢書誤本今譌作令遂加石作砮以配礮字爲地名耳實則礮谿口亦非春秋時河徙之地也

曰簡曰潔 潔爾雅釋水本作絜朱子孟子集注始加水作潔蔡氏書傳因之非也